

滎陽外史集

欽定四庫全書

榮陽外史集卷六十

明鄭真撰

表

高祖武德元年萬年縣法曹孫伏珈謝除治書侍
御史表

伏以顯賢任能誕著聖明之治瞽言狂直曷庸忠蓋之
求恩綸上過於堯言束帛有加于周賚循牆莫避伏地

知慙

中謝

竊惟自古之用人惟待諍臣而加禮蓋於舉繆

繩愆之任責以論思獻納之才匪具股肱何宜耳目如
臣某者性資鄙賤學術荒疎后非賢不乂訓戒敢違於
天子邦有道如矢幽獨常凜乎聖明敬當真主之龍飛
欣幸清時之燕喜每懷愚慮更切周咨爰陳經久之規
永示將來之矩京畿分牧已依日月之光臺閣高升普徧
雲天之澤何以有裨於聖治將期永固於基圖俯仰懷慙
周章就列恭惟皇帝陛下聖姿神武天性聰明厯數有

歸禪授實同於有夏民心樂戴政刑盡革於亡隋尚為
邪佞之防用審忠賢之得言思逆耳事在利行臣某敢
不思報隆知勉肩所職惟忠可以事上敢接武於夔龍
非道不敢陳前願致君於堯舜

同前題

伏以治隆聖運誕昭宸極之光任重憲綱增賁臺端之

秩撫躬不稱拜手知榮

中謝

竊惟人才之盛衰嘗係世道

之輕重非有明目張膽俾山嶽之動搖何以弭患消奸

致邦家之平治久念股肱之任咸惟耳目之臣若稽
獻猷夙聞往昔烏臺柏府聲凜凜以生風驄馬鐵冠止
行行而避路故得敢言之士庶為司憲之官伏念臣某
才不逮人學非聞道自分簿書之末不離刀筆之中幸
蒙真主之勃興普與斯民而更始奮心自厲克志有為
爰陳三事之敗亡以為今來之勸戒冕旒清穆方瞻北
闕之華冠豸巍我遽拜南床之擢循牆莫避臨谷惟兢
恭惟皇帝陛下緯武經文撥亂反正天戈所指廣揚震

動之威日御時乘大啓離明之運致茲孱瑣服此休嘉
龍鳳交章寵及便蕃之命鵷鸞造羽榮隨侍從之班用
來蹇蹇之忠期盡惓惓之益輝光分荷報稱至難臣某
敢不思厲忠規煥揚風采以商周為鑒願益宏社稷之
基非堯舜不陳其敢後人臣之義謹奉表稱謝以聞

武德四年秦王謝除天策上將軍表

伏以愛始家邦誕厚親親之義禮登策府備隆將將之
權拜命惟榮撫躬以惕中謝臣某恩隆慈育教服義方

性靡習于溫文才不全於韜畧早逢聖運躬履戎行仰
承睿算之無遺上稟廟謨之全定正正之旗堂堂之陣
則莫敢承赫赫厥聲濯濯厥靈有征無戰一洗關河之
壯觀盡除宗廟之妖氛皆聖武之布昭豈臣微之能致
敢冀非常之賞以須希有之榮苴土分茅既侈裂封之
盛齋壇建閭又加崇拜之榮位長王侯寵深君父有倬
龍飛之造於昭燕翼之謀恭惟皇帝陛下篤敘彞倫任
隆肺腑綿本支于百世衍祚嗣于萬年緯武經文建邦

樹屏念周封同姓務崇列國之名謂晉爵諸王亦冠督
軍之任肆加時禮式表隆名左右旄旌總萬屯之森衛
出入幃幄收四海之俊髦密聯玉闕之華輝映金枝之
秀遭逢侈矣報稱謂何某敢不誕承明威紹膺景命刑
賞懋明於天道修攘期布於王靈夙夜基宥殫厥心用
贊協恭之妙國家閒暇明其政預嚴思患之防

太宗貞觀十七年魏徵謝賜殿材素屏風素褥几

杖表

伏以內廷錫寵誕昭三接之榮秘殿賜材爰及多儀之
備感恩以惕拜命惟榮

中謝

念某昏耄餘生卑棲無用

志業恐隳於堂構行藏每慎於興居取規矩以為方圓
匪有成物之智徹桑土而葺戶牖夙無備患之材屬當
四海以為家欣幸一人之有慶天開雲母會同日近於
清光坐列氍毹宴賜俯同於前席匪有藉依憑之寵庶
幾防傾跌之虞惟桑榆漸迫於衰頽而繩甕不忘於貧
賤報颺莫稱寢食靡遑指事詳陳囊一封而晉奏拜恩

寫奕萃衆美以鼎來松出徂徠栢來新甫刀踞靡辭于
斲削文尋紛就於謀為屏褥爛皓素之光輝几杖妙曲
繆之形制于以棲塵而鄣日于焉扶老以養和植其庭
覺其楹言居言處瞻爾前顧爾後以翼以扶寵冠簪紳
輝生門戶恭惟皇帝陛下明明天日之表巍巍龍鳳之
姿從諫如轉圜用人猶不及處身以儉極土階茅茨之
心養老以誠盛廣厦細氈之奉致茲衰朽亦與恩光臣某
敢不思盡謀為恪遵程度物其多矣適居寢動靜之宜

厚莫重焉盡骨肉死生之報

貞觀四年張蘊古獻大寶箴表

伏以聖人大寶曰位治亂實係於怠勤臣子責難為恭
職業敢忘於箴儆俯殫悃悞仰徹宸聰某竊聞成湯君
臨萬方式謹盤銘之戒衛公年逾九表不忘抑戒之辭
盖人君居四海之尊以天下奉一己之欲自非動觀默
省保厥祚之惟艱何以持盈守成垂洪猷於久遠恭惟
上聖遠冠前王方九重垂御之初寶萬方臨照之始雖

盛德不忘於兢業而嘉猷必致其忠規用殫聞見之愚
上瀆高明之聽恭惟皇帝陛下明明天日之表巍巍龍
鳳之姿乃聖乃神恢漢高之大度有嚴有翼用文王之
小心瞻後慮前慎終惟始凡而德業皆本生知永惟日
月之明尚採蒨蕞之論聲為律身為度式禮無愆天之
經地之寧與民同慶旦以復旦新以致新臣某幸服下
僚親逢嘉運常厥德保厥位益恢王業之隆竭其力致
其身務盡臣隣之益

貞觀十三年房玄齡請解機務表

伏以尊居廊廟豈勝告老之心望動山林願遂投閒之

想謹裁臚牘仰竇宸旒

中謝

竊以天生不世出之興王時

則有非常之哲輔伊尹咸有一德心腹同乎傳說命總
百官精神夙契茲所謂風雲之遇用能成霖雨之功豈
此謫材久持魁柄伏念臣某夙由下士獲際明君選除
遍歷于高華僥倖夙膺於揀擢爰由吏部遂總中書位
居家宰之尊任處天下之重體陰陽造化有愧和調錫

山川土田屢叨恩數自慮股肱之墮乃承體貌之隆既
忝國姻復居儲傅惟素餐之益甚思洪造之難酬願解
繁機少安愚分恭惟皇帝陛下天姿勤儉聖度恢弘乘
雲氣而御飛龍官天下而府寰海舉相十六幸觀熙載
之能有臣三千咸得和衷之助茲惟庸菲久處弼諧每
懷陳力之言敢員知止之義伏望俯加垂照曲賜保全
別援真賢俾獨當於鈞軸庶幾晚節願終老于桑榆

貞觀七年魏徵謝賜金甕表

伏以金馬高嚴寵承諏訪甕鷄微賤謬極恩榮拜首承

休捫心增惕

中謝

伏念某鈍頑之質陶冶之姿久負孤忠

匪堅剛之百鍊蚤承錫用屬器使於羣工上陪日月之

光下獻蕩蕩之議但思粉骨豈敢愛身不圖天陞之優

容復拜內廷之寵賜光華璀璨堪承玉露之灑灑形質

空虛似映器車之煜煜豈遠來於異國抑近出於諸山

度彼瓶罌姿非瓊臂是將廣開於言路故茲特發於宸

衷茲蓋伏遇皇帝陛下天性聰明聖度豁達謂言辭塞

直可為有國之禪故詔旨都俞爰輟尚方之御輝生牖
戶銘徹肺肝臣某敢不祇誦堯言服膺周賚中正不倚
非但如周官醢醢之供恢廓有容其敢為漢陰抱灌之
具

貞觀七年十二月帝奉太上皇置酒未央宮羣臣
賀上表

伏以堯父舜子赫焉日月之重輝文德武功盛矣樽壘
之展慶事隆宗社榮被縉紳

中謝

竊以人倫無過於尊親